

In memoriam simeon “sim” frank

Na principio di añanan '50, un hoben di Noord tabata entre e prome hobennan Arubano pa bay sigui su estudio na un Kweekschool pa formacion di maestro di scol y a bay Baarle

Nassau/ Noord Brabant, Hulanda, di e Fraternan De La Salle. Simeon Andronico Frank, conoci con Yon of Sim, a bolbe Aruba despues di 4 aña na Hulanda cu su diploma

como maestro hoofdakte.

Simeon a traha na varios scol básico na Aruba, entre nan na Noord, Paradera y St. Cruz. Durante hopi aña e tabata cabesante di e scol básico na Kadushi Largo y despues a bira director di Maria College ETAO y di aki el a bay disfruta di su pensioen.

El a yuda den formacion di masha hopi hoben cu awendia ta adultonan respeta den comunidad y di hopi profesional ocupando posicionnan halto den diferente empresa.

Pero atravez di añanan, Simeon tabata tambe hopi activo riba diferente otro tereno.

Pa varios aña e tabata un di e hungadornan estelar di su equipo di futbol Jong Aruba. Simeon tabata posee tambe un grado como docente di obra di man y como tal durante hopi aña tabata encarga cu cursonan di pintura, diseño y

sculptura na Cas di Cultura, na Skol di Arte na San Nicolas y tambe na Centro di Bario Noord.

Un di su obranan ta e diseño grandi di mosaico cu ta dorna e edificio di Skol di Arte na San Nicolas. Hopi hoben y adulto a sigui e cursonan aki y ta sigur cu den nan hogar nan tin obranan di arte cu nan a traha durante e cursonan duna pa Sim Frank.

Pa hopi aña, Sim tabata forina parti di directiva y miembro di Fundacion Centro Cultural Aruba (Stichting C.C.A.) y tambe como miembro di Stichting Schouwburg Aruba cu ta maneha Cas di Cultura. Simeon Frank tabata un di e miembronan fundador di Fundacion Union di Organizacionnan Cultural Arubano – conoci como UNOCA y durante varios aña a forma parti di e directiva. E tabata tambe miembro fundador di Fundacion

Arubano di Arte- Stichting FUNDARTE, di cual e tabata vice-presidente y tesorero durante 10 aña. Pa tur su meritonan como voluntario riba tereno educativo, social y cultural, el a ricibi e Condecoracion Real como Ridder den Orden di Oranje Nassau. Sr. Simeon Frank ta laga atras su esposa Crispina, su yuinan Giselle kende ta dokter na Hulanda y Karina kende a sigui e pasonan di su tata como maestra di scol na Kadushi Largo. Nan por ta orguyoso di un esposo y un tata manera Simeon.

Forza y Bendicion di Todopoderoso na tur famia, amigo y conocirnan di Simeon. Cu Sim Frank descansa na Paz.

Leonardo Tromp
Ex-Director di Instituto di Cultura Aruba